

Na osnovu člana 19, stav 4 Statuta Udruženja poslodavaca Bosansko-podrinjskog kantona Goražde, Skupština UPBPK Goražde na Sjednici održanoj 17.03.2010.godine u Goraždu donosi:

## **ETIČKI**

# **K O D E K S**

## **POSLODAVACA**

Poslodavci imaju ključnu ulogu u privrednom razvoju države, posebno u današnjim prilikama, kada je razvoj preduzetništva značajan faktor za razvoj privrede, a samim tim i države.

U takvim okolnostima djelovanje poslodavaca je od odlučne važnosti.

Etička načela poslovanja treba da daju svoj doprinos većoj humanosti i uspješnosti u obavljanju privrednih djelatnosti, a posebno u stvaranju privredne kulture.

Svoje aktivnosti usmjerićemo na sledeće :

Štitićemo poslodavačka i preduzetnička prava i slobode.

Težićemo unapređenju tržišnih uslova poslovanja, razvoju konkurentnosti i stvaranju povoljne preduzetničke klime.

Svoje cjelokupno nastojanje usmjerićemo na stalno povećanje standarda zaposlenih i svih onih čiji materijalni položaj zavisi od rada privrednog društva. Težićemo povećanju životnih standarda u cilju stvaranja materijalnih i nematerijalnih dobara koja čovjeku dugoročno omogućavaju bolji način života. Za stalno povećanje životnog standarda neophodna je dobit, što razumijemo kao izdvajanje danas, za bolje sutra. Zato se nećemo zauzimati samo za stvaranje dobiti, nego za takvu upotrebu dobiti koja će stvarno povećati blagostanje. Dobit nećemo moći ostvarivati s nezadovoljnim saradnicima, s nezadovoljnim partnerima, te s toga težimo uspješnoj međusobnoj saradnji .

Kao što je dobit potreban uslov za povećanje blagostanja, znamo da je povećanje životnog standarda moguće ostvariti ne samo novcem, već i nematerijalnim dobrima, kao što su, npr. kvalitetni međuljudski odnosi, zadovoljstvo u radu i slično.

Težićemo razvoju demokratije kroz razvoj i unapređenje socijalnog dijaloga.

Promovišaćemo zaštitu sistema privatne inicijative i tržišne ekonomije.

Braneći svoja prava nećemo gušiti prava drugih.

Zalagaćemo se za takav privredni ambijent u kome će država stvoriti povoljne uslove za zdrav i stabilan razvoj preduzetništva, a privrednim društvima dopustiti da slobodno rade po dogovorenim pravilima.

Zalagaćemo se za to da država usklađuje svoje interese s privredom, a ne da nam ih nameće.

Zalagaćemo se za slobodu, a ujedno i za red u državi i privredi.

Snažno ćemo se zalagati za suzbijanje korupcije, sive ekonomije i svih pojava koje ometaju i opterećuju privredni i društveni rast i razvoj.

Zastupaćemo stanovište da država treba da postigne zdrav i stabilan razvoj na prirodan način, to jest na temeljima zdrave konkurencije. Nastojaćemo da privredna društva koja vodimo budu sposobna da se održe i budu konkurentna i na međunarodnom planu.

Nastojaćemo da što bolje upoznamo potrebe potrošača i zadovoljavati ih što kvalitetnije uz konkurentne cijene.

Zauzimaćemo se za prodaju zdravih, sigurnih i korisnih proizvoda.

Akcijama za podsticanje prodaje potrošačima nećemo podmetati niti ih podsticati na ponašanje štetno za zdravlje.

Zaposlene ćemo voditi tako da se razviju u samostalne i prijatne osobe, koje sa zadovoljstvom rade za svog poslodavca. Pravo raspolaganja njihovom radnom snagom nećemo shvatati kao pravo samovoljnog raspolaganja ljudima, već ćemo poštovati zakone, druge propise i ugovorne obaveze.

Poštovaćemo preporuke kolega poslodavaca prilikom prijema u radni odnos radnika, uz obavezu da preporuke budu objektivne i tačne.

Nastojaćemo stvoriti za zdravlje što manje štetno radno okruženje i što povoljnije uslove rada.

S kupcima i dobavljačima stvaraćemo saradnju utemeljenu na uzajamnom povjerenju, koje ćemo zasnivati na dosljednom poštovanju dogovorenog.

Kvalitet, rokovi, poštena cijena i usluga, temelj su dobrih odnosa.

Ugovore ćemo sklapati uz uslove koje smo sposobni ostvariti u skladu s dobrim poslovnim običajima.

Svoje ćemo dobavljače i kupce pravovremeno obavijestiti o onim našim planovima od kojih zavisi naša buduća saradnja.

U konkurenciji ćemo biti lojalni i poštovati sve pravne propise, poslovne običaje i poslovni moral.

Državi se nećemo suprotstaviti u sprečavanju monopola.

Poslovne tajne čuvaćemo od konkurencije, a prednost nećemo pokušati ostvariti lažima ili na druge nemoralne načine.

Svjesni smo da smo izloženi javnosti. Zato ćemo dio svog rada posvetiti i javnom radu. Javnost ćemo redovno i pravovremeno izvještavati o bitnim činjenicama našeg poslovanja, koje mogu biti od opšte važnosti.

Dobrobit preduzeća usklađivaćemo s dobrobitima naroda i države.

Dobrovoljno ćemo prihvatati javne i humanitarne funkcije.

Zauzimaćemo se za takva ekološka pravila koja će čovjeku i drugim živim bićima biti prijatna. Pazićemo da proizvodima, otpadnim sirovinama, ambalažom i sličnim ne ugrožavamo prirodu. Smanjićemo nastanak svih štetnih materija i otpada. Sirovine i energiju trošićemo štedljivo i tako smanjiti narušavanje prirodne sredine.

Obavezujemo se da ćemo poštovati 10 principa Globalnog Sporazuma UN:

**Princip 1:**

Preduzeća će podržavati i poštovati zaštitu međunarodno proklamovanih ljudskih prava

**Princip 2:**

Osigurati da preduzeća ni na koji način ne učestvuju u kršenju ljudskih prava

**Princip 3:**

Podržati slobodu udruživanja i efektivno priznati pravo na kolektivno pregovaranje

**Princip 4:**

Eliminisati sve oblike prinudnog ili obaveznog rada

**Princip 5:**

Ukinuti rad djece

**Princip 6:**

Eliminacija diskriminacije po pitanju zaposlenja i zanimanja

**Princip 7:**

Preduzeća će podržavati pristup predostrožnosti u izazovima zaštite životne sredine

**Princip 8:** Preduzeti inicijativu za promovisanje odgovornosti prema životnoj sredini

**Princip 9:** Ohrabrivati razvoj i korišćenje ekološki prihvatljivih tehnologija

**Princip 10:** Biznis će se boriti protiv svih oblika korupcije uključujući iznuđivanje i mito

Obavezujemo se da ćemo poštovati i dati svoj puni doprinos ostvarivanju Milenijumskih Razvojnih Ciljeva Ujedinjenih Nacija.

**Milenijumski ciljevi:**

1. Iskorjenjivanje krajnjeg siromaštva i gladi,
2. Postići univerzalno osnovno obrazovanje,
3. Promovisanje jednakosti polova i prava žena,
4. Smanjiti smrtnost djece,
5. Poboljšati zdravlje majki,
6. Borba protiv AIDS, malarije i drugih oboljenja,
7. Osigurati održivost životne sredine,
8. Razviti globalno partnerstvo i razvoj.

U svom poslovanju pridržavaćemo se sledećih:

**N A Č E L A**

Međusobne poslodavačke solidarnosti i podrške.

Društvene odgovornosti poslodavaca.

Jednako pravo prilikom zapošljavanja jedno je od temeljnih načela.

Seksualno uznemiravanje je zabranjeno.

Sigurnost i zdravlje zaposlenog je uslov normalnog poslovanja.

Ugovori s državnim ili poslovnim ustanovama moraju biti usklađeni sa zakonskim propisima i načelima poslovnog ponašanja.

Promovisanje treba biti utemeljeno na istinitim podacima.

Intelektualno vlasništvo, dostignuća, izumi, patenti, poslovni rezultati itd., koje je ostvario pojedinac ili grupa radnika u vrijeme radnog odnosa s organizacijom, potpuno su i nepovredivo vlasništvo organizacije.

Pošteni odnosi s partnerima preduslov su izgradnje povjerenja.

Prisvajanje imovine u vlasništvu privrednog društva nije dopušteno.

Političke aktivnosti mogu se obavljati u slobodno vrijeme i na vlastiti trošak.

Broj: 20-01/10

Goražde: 17.03.2010

***Predsjednik Skupštine***

***Avdo Kuljuh s.r.***

